

摘藻堂四庫全書薈要

史部

欽定四庫全書薈要

史部  
通志卷一百五

詳校官員外郎臣楊世綸



欽定四庫全書薈要卷九千十三

史部

通志卷一百五

宋右迪功郎鄭樵漁仲撰

傳第十八

後漢

李通 王常 鄧晨 來歙

曾孫

鄧禹 禹孫康

訓子騰

騰

寇恂

曾孫

馮異

岑彭

元

孫

賈復

子宗

兄弘

朱寵

吳漢 蓋延 陳俊 臧宮

李通字次元南陽宛人也世以貨殖著姓父守身長九尺容貌絕異為人嚴毅居家如官廷初事劉歆好星歷識記為王莽宗卿師通亦為五威將軍從事出補丞丞有能名莽末百姓愁怨通素聞守說識云劉氏復興李氏為輔私常懷之且家居富逸為閭里雄以此不樂為吏乃自免歸及下江新市兵起南陽騷動通從弟軼亦素好事乃共計議曰今四方擾亂新室且亡漢當更興南陽宗室獨伯升兄弟汎愛容衆可與謀大事通笑曰

吾意也會光武避事在宛通聞之即遣軼往迎光武光武初以通士君子相慕也故往答之及相見共語移日握手極歡通因具言讖文事光武初殊不意未敢當之時守在長安光武乃微觀通曰即如此當如宗卿師何通曰已自有度矣因復備言其計光武既深知通意乃遂相結約定謀議期以材官都試騎士日欲劫前隊大夫及屬正因以號令大衆乃使光武與軼歸舂陵舉兵以相應遣從兄子季之長安以事報守季於道病死守

密知之欲亡歸素與邑人黃顯相善時顯為中郎將聞之謂守曰今閹門禁嚴君壯貌非凡將以此安之不如詣闕自歸事既未然脫可免禍守從其計即上書歸死章未及報留闕下會事發覺通得亡走莽聞之乃繫守於獄而黃顯為請曰守聞子無狀不敢逃亡守義自信歸命宮闕臣顯願質守俱東曉說其子如遂悖逆令守北向刎首以謝大恩莽然其言會前隊復上通起兵之狀莽怒欲殺守顯爭之遂并被誅及守家在長安者盡

誅之南陽亦誅通兄弟門宗六十四人皆焚屍宛市時  
漢兵亦已大合通與光武李軼相遇棘陽遂共破莽前  
隊殺甄阜梁丘賜更始立以通為柱國大將軍輔漢侯  
從至長安更拜為大將軍西平王軼為舞陰王通從弟  
松為丞相更始使通持節還鎮荊州通因娶光武女弟  
伯姬是為寧平公主光武即位徵通為衛尉建武二年  
封固始侯拜大司農帝每征討四方常令通居守京師  
鎮撫百姓修宮室起學官五年春代王梁為前將軍六

年夏領破姦將軍進捕虜將軍王霸等十營擊漢中賊  
公孫述遣兵赴救通等與戰於西城破之還屯田順陽  
時天下畧定通思欲避榮寵以病上書乞身詔下公卿  
羣臣議大司徒侯霸等曰王莽篡漢傾亂天下通懷伊  
呂蕭曹之謀建造大策扶助神靈輔成聖德破家為國  
忘身奉主有扶危存忘之義功德最高海內所聞通以  
天下平定謙讓辭位夫安不忘危宜令通居職療疾欲  
就諸侯不可聽於是詔通勉致醫藥以時視事其夏引



拜為大司空通布衣唱義助成大業重以寧平公主故特見親重然性謙恭常欲避權執素有消疾自為宰相謝病不視事連年乞骸骨每優寵之令以公位歸第養疾通復固辭積二歲乃聽上大司空印綬以特進奉朝請有司奏請封皇子帝感通首創大謀即日封通少子雄為召陵侯帝每幸南陽常遣使者以太牢祠通父冢十八年卒諡曰恭侯帝及皇后親臨弔送葬子音嗣音卒子定嗣定卒子黃嗣黃卒子壽嗣李軼後為朱鮪所

殺更始之敗李松戰死惟通能以功名終永平中顯宗  
幸宛詔諸李隨安衆宗室會見並受賞賜恩寵焉

王常字顏卿潁川武陽人也王莽末為弟報仇亡命江  
夏久之與王鳳王匡等起兵雲杜綠林中聚衆數萬人  
以常為偏裨攻傍縣後與成丹張卬別入南郡藍口號  
下江兵王莽遣嚴尤陳茂擊破之常與丹卬收散卒入  
婁谿劫畧鍾龍間衆復振引軍與荊州牧戰於上唐大  
破之遂北至宜秋是時漢兵與新市平林兵衆俱敗於

小長安各欲解去伯升聞下江軍在宜秋即與光武及李通俱造常壁曰願見下江一賢將議大事成丹張卬共推遣常伯升見常說以合從之利常大悟曰王莽篡弑殘虐天下百姓思漢故豪傑並起今劉氏復興即真主也誠思出身為用輔成大功伯升曰如事成豈敢獨饗之哉遂與常深相結而去常還具謂丹卬言之丹卬負其衆皆曰大丈夫既起當各自為主何故受人制乎常心獨歸漢乃稍曉說其將帥曰往者成哀哀微無嗣

故王莽得乘間篡位既有天下而政令苛酷積失百姓之心民之謳歌思漢非一日也故使吾屬因此得起夫民所怨者天所去也民所思者天所與也舉大事必當下順民心上合天意功乃可成若負疆恃勇觸情恣欲雖得天下必復失之以秦項之勢尚至夷覆況今布衣相聚草澤以此行之滅亡之道也今南陽諸劉舉宗起兵觀其來議事者皆有深計大慮王公之才與之并合必成大功此所以祐吾屬也下江諸將雖屈疆少識然

素敬常乃皆謝曰無王將軍吾屬幾陷於不義願敬受  
教即引兵與漢軍及新市平林合於是諸部齊心同力  
銳氣益壯遂俱進破殺甄阜梁邱賜及諸將議立宗室  
惟常與南陽士大夫同意欲立伯升而朱鮪張卬等不  
聽及更始立以常為廷尉大將軍封知命侯別徇汝南  
沛郡還入昆陽與光武共擊破王尋王邑更始西都長  
安以常行南陽太守事令專命誅賞封為鄧王食八縣  
賜姓劉氏常性恭儉遵法度南方稱之更始敗建武二

年夏常將妻子詣洛陽肉袒自歸光武見常甚歡勞之  
曰王廷尉良苦每念往時共更難厄何日忘之莫往莫  
來豈違平生之言乎常頓首謝曰臣蒙大命得以鞭策  
託身陛下始遇宜秋後會昆陽幸賴靈武輒成斷金更  
始不量愚臣任以南州赤眉之難喪心失望以為天下  
復失綱紀聞陛下即位河北心開目明今得見闕庭死  
無遺恨帝笑曰吾與廷尉戲耳吾見廷尉不憂南方矣  
乃召公卿將軍以下大會具為羣臣言常以匹夫興義

兵明于知天命故更始封為知命侯與吾相遇兵中尤  
相厚善特加賞賜拜為左曹封山桑侯後帝於大會中  
指常謂羣臣曰此家率下江諸將輔翼漢室心如金石  
真忠臣也是日遷常為漢忠將軍遣南擊鄧奉董訢令  
諸將皆屬焉又詔北擊河間漁陽平諸屯聚五年秋攻  
拔湖陵又與帝會任城因從破蘇茂龐萌進攻下邳常  
部當城門戰一日數合賊反走入城常追迫之城上射  
矢雨下帝從百餘騎自城南高處望常戰力甚馳遣中

黃門詔使引還賊遂降又別率騎都尉王霸共平沛郡  
賊六年春徵還洛陽令夫人迎常於舞陽歸家上冢西  
屯長安拒隗囂七年使使者持璽書即拜常為橫野大  
將軍位次與諸將絕席常別擊破隗囂將高峻於朝那  
囂遣將過烏氏常要擊破之轉降保塞羌諸營壁皆平  
之九年擊內黃賊破降之後北屯故安拒盧芳十二年  
薨於屯所諡曰節侯子廣嗣三十年徙封石城侯永平  
十四年坐與楚事相連國除



鄧晨字偉卿南陽新野人也世吏二千石父宏豫章都尉晨初娶光武姊元王莽末世祖嘗與兄伯升及晨俱之宛與穰人蔡少公等譙語少公頗學圖讖言劉秀當為天子或曰是國師公劉秀乎光武戲曰何用知非僕邪坐者皆大笑晨心獨喜及光武與家屬避吏新野舍晨廬甚相親愛晨因謂光武曰王莽悖暴盛夏斬人此天亡之時也往時會宛獨當應耶光武笑不答及漢兵起晨將賓客會棘陽漢兵敗小長安諸將多亡家屬光

武單馬遁走遇女弟伯姬與共騎而奔前行復見元趣  
令上馬元以手攜曰行矣不能相救無為兩沒也會追  
兵至元及三女皆遇害漢兵退保棘陽而新野宰乃汙  
晨宅焚其冢墓宗族皆恚怒曰家自富足何故隨婦家  
人入湯鑊中晨終無恨色更始立以晨為偏將軍與光  
武畧地潁川俱夜出昆陽城擊破王尋王邑又別徇陽  
翟以東至京密皆下之更始北都洛陽以晨為常山太  
守會王郎反光武自薊走信都晨亦間行會於鉅鹿下

自請從擊邯鄲光武曰偉卿以一身從我不如以一郡  
為我北道主人乃遣晨歸郡光武追銅馬高胡賊於冀  
州晨發積射士千人又遣委輸給軍不絕光武即位封  
晨房子侯帝又感悼姊沒於亂兵追封諡元為新野節  
義長公主立廟于縣西封晨長子汎為吳房侯以奉公  
主之祠建武三年徵還京師數讌見說故舊平生為歡  
晨從容謂帝曰僕竟辯之帝大笑從幸章陵拜光祿大  
夫使持節監執金吾賈復等平邵陵新息賊四年從幸

壽春留鎮九江晨好樂郡職由是復拜為中山太守吏  
民稱之常為冀州高第十三年更封南緣侯入奉朝請  
復為汝南太守十八年行幸章陵徵晨行廷尉事從至  
新野置酒酣讌賞賜數百十萬復遣歸郡晨興鴻卻陂  
數千頃田汝土以殷魚稻之饒流行他郡明年定封西  
華侯復徵奉朝請二十五年卒詔遣中謁者備公主官  
屬禮儀招迎新野主魂與晨合葬於北邙乘輿與中宮  
親臨送葬諡曰惠侯小子崇嗣後徙封武當崇卒子固

嗣固卒子國嗣國卒子福嗣永建元年卒無子國除

來歙字君叔南陽新野人也六世祖漢有才力武帝時以光祿大夫副樓船將軍楊僕擊破南越朝鮮父仲哀帝時為諫議大夫娶光武祖姑生歙光武甚親敬之數共往來長安漢兵起王莽以歙劉氏外屬乃收繫之賓客共篡奪得免更始即位以歙為吏從入閩數言事不用以病去歙女弟為漢中王劉嘉妻嘉遣人迎歙因南之漢中更始敗歙勸嘉歸光武遂與嘉俱東詣洛陽帝

見歛大歡即解衣以衣之拜為太中大夫是時方以隴  
蜀為憂帝謂歛曰今西州未附子陽稱帝道里阻遠諸  
將方務關東西州方畧未知所任其謀若何歛因自請  
曰臣嘗與隗囂相遇長安其人始起以漢為名今陛下  
聖德隆興臣願得奉威命開以丹青之信囂必束手自  
歸則述自亡之勢不足圖也帝然之建武三年歛始使  
隗囂五年復持節送馬援因奉璽書於囂既還復往說  
囂囂遂遣子恂隨歛入質拜歛為中郎將山東畧定帝

謀西收囂兵與俱伐蜀復使歛諭旨囂將王元說囂多  
設疑故久猶豫不決歛素剛毅遂發憤責囂曰國家以  
君知臧否識廢興故以手書暢意足下推忠誠遣伯春  
委質是臣主之交信也今反用佞惑之言為族滅之計  
叛主負子違背忠信乎吉凶之決在於今日欲前刺囂  
囂起入部糾兵將殺歛歛徐杖節就車而去囂愈怒王  
元勸囂殺歛使牛邯將兵圍守之囂將王遵諫曰愚聞  
為國者慎器與名為家者畏怨重禍俱慎名器則下服

其命輕用怨禍則身受其殃今將軍遣子質漢內懷他志名器逆矣外人有議欲謀漢使輕怨禍矣古者列國兵交使在其間所以重信貴和而不任戰也何況承王命籍重質而犯之哉君叔以單車遠使而陛下之外兄也害之無損於漢而隨以族滅昔宋執楚使遂有析骸易子之禍小國猶不可辱況於萬乘之主重以伯春之命哉歟有信義言行不違及往來陳說皆可案覆西州士大夫信重之多為其言故得免而東歸八年歟與征



虜將軍祭遵襲畧陽遵道病還分遣精兵隨歆合二千

餘人伐山開道從番須回中徑至畧陽斬囂守將金梁

因保其城囂大驚曰何其神也乃悉兵數萬人圍畧陽

斬山築隄激水灌城歆與將士死守矢盡乃發屋斷木

以為兵囂盡銳攻之自春至秋其士卒疲弊帝乃大發

關東兵自將上隴囂衆潰走圍解於是置酒高會勞賜

歆班坐絕席在諸將之右賜歆妻縑千疋詔使留屯長

安悉監護諸將歆因上書曰公孫述以隴西天水為藩

蔽故得延命假息今二郡平蕩則述智計窮矣宜益選  
兵馬儲積資糧昔趙之將帥多賈人高帝懸之以重賞  
今西州新破兵人饑饉若招以財穀則其衆可集臣知  
國家所給非一用度不足然有不得已也帝然之於是  
大轉糧運詔歛率征西大將軍馮異建威大將軍耿弇  
虎牙大將軍蓋延揚武大將軍馬成武威將軍劉尚入  
天水擊敗述將田弇趙匡明年攻拔落門隗囂支黨周  
宗趙恢及天水屬縣皆降初王莽世羌虜多背叛而隗

囂招懷其酋豪遂得為用及囂亡後五谿先零諸種數為寇掠皆營塹自守州郡不能討歙乃大修攻具率蓋延劉尚及太中大夫馬援等進擊羌於金城大破之斬首虜數千級獲牛羊萬餘頭穀數十萬斛又擊破襄武賊傅栗卿等隴西雖平而人饑流者相望歙乃傾倉廩轉運諸縣以賑贍之於是隴西遂安而涼州流通焉十一年歙與蓋延馬成進攻公孫述將王元環安於河池下辯陷之乘勝入蜀蜀人大懼使刺客刺歙未殊馳召

蓋延延見歎因伏悲哀不能仰視歎叱延曰虎牙何敢  
然今使者中刺客無以報國故呼巨卿欲相屬以兵事  
而反效兒女子涕泣乎刃雖在身不能勒兵斬公邪延  
收淚疆起受所誠歎自書表曰臣夜人定後為何人所  
賊傷中臣要害臣不敢自惜誠恨奉職不稱以為朝廷  
羞夫理國以得賢為本太中大夫段襄骨鯁可任願陛  
下裁察又臣兄弟不肖終恐被罪陛下哀憐臣數賜教  
督投筆抽刃而絕帝聞大驚省書覽涕使太中大夫贈

歛中郎將征羌侯印綬諡曰節侯謁者護喪事喪還洛陽乘輿縞素臨弔送葬以歛有羌隴之功故改汝南之當鄉縣為征羌國焉子褒嗣十三年帝嘉歛忠節復封歛弟由為宜西侯褒子稜尚顯宗女武安公主稜早歿褒卒以稜子歷為嗣歷字伯珍少龍襲爵以公主子永元中為侍中監羽林右騎永初三年遷射聲校尉永寧元年代馮石為執金吾延光元年尊歷母為長公主二年遷歷太僕明年中常侍樊豐與大將軍耿寶侍中周廣

謝暉等共譖陷太尉楊震震遂自殺歷謂御史虞詡曰  
耿寶託元舅之親榮寵過厚不念報國恩而傾側姦臣  
誣奏楊公傷害忠良其天禍亦將至矣遂絕周廣謝暉  
不與交通時皇太子驚病不安避幸安帝乳母野王君  
王聖舍太子乳母王男厨監邴吉等以為聖舍新繕修  
犯土禁不可久御聖及其女永與大長秋江京及中常  
侍樊豐王男邴吉等互相是非聖永遂誣譖男吉皆幽  
囚死家屬徙北景太子思男等數為歎息京豐懼有後

害妄造虛無構讒太子及東宮官屬帝怒召公卿以下  
會議廢立耿寶等承旨皆以為太子當廢歷與太常桓  
馬廷尉張皓議曰經說年未滿十五過惡不在其身且  
男吉之謀皇太子容有不知宜選忠良保傅輔以禮義  
廢置事重此誠聖恩所宜宿留帝不從是日遂廢太子  
為濟陰王時監太子家小黃門籍建中傅高梵等皆以  
無罪徙朔方歷乃結光祿勳祲諷宗正劉禕將作大匠  
薛皓侍中問邱弘陳光趙代施延太中大夫朱伉第五

顏中散大夫曹成諫議大夫李尤符節令張敬持書侍  
御史龔調羽林右監孔顯城門司馬徐崇衛尉守丞樂  
闡長樂未央廐令鄭安世等十餘人俱詣鴻都門證太  
子無過龔調據法律明之以為男吉犯罪皇太子不當  
坐帝與左右患之乃使中常侍奉詔脅羣臣曰父子一  
體天性自然以義割恩為天下也歷諷等不識大典而  
與羣小共為謹諱外見忠直而內希後福飾邪違義豈  
事君之禮朝廷廣開言事之路故且一切假貸若懷迷



不反當顯明刑書諫者莫不失色薛皓先頓首曰固宜  
如明詔歷怫然廷詰皓曰屬通諫何言而今復背之大  
臣乘朝車處國事固得輾轉若此乎乃各稍自引起歷  
獨守闕連日不肯去帝大怒乃免歷兄弟官削國租黜  
公主不得會見歷遂杜門不與親戚通時人為之震慄  
及帝崩閭太后起歷為將作大匠順帝即位朝廷咸稱  
社稷臣於是遷為衛尉祓諷劉禕閭丘弘等先卒皆拜  
其子為郎朱伉施延陳光趙代等並為公卿任職徵王

男邴吉家屬還京師厚加賞賜籍建高林等悉蒙顯擢  
永建元年拜歷車騎將軍弟祉為步兵校尉超為黃門  
侍郎三年母長公主薨歷稱病歸第服闋復為大鴻臚  
陽嘉二年卒官子定嗣定尚安帝妹平氏長公主順帝  
時為虎賁中郎將定卒子虎嗣桓帝時為屯騎校尉弟  
豔字季德少好學下士開館養徒少歷顯位靈帝時再  
遷司空

鄧禹字仲華南陽新野人也年十三能誦詩受業長安

時光武亦遊學京師禹雖幼而見光武知非常人遂相親附數年歸家及漢兵起更始立豪傑多薦舉禹不肯從及聞光武安集河北即杖策北渡追及於鄴光武見之甚歡謂曰我得專封拜生遠來寧欲仕乎禹曰不願也光武曰即如是何欲為禹曰但願明公威德加於四海禹得效其尺寸垂功名於竹帛耳光武笑因留宿間語禹乃進說曰更始雖都關西今山東未安赤眉青犢之屬動以萬數三輔假號往往羣起更始既未有所

挫而不自聽斷諸將皆庸人屈起志在財幣爭用威力朝夕自快而已非有忠良明智深慮遠圖欲尊主安民者也四方分崩離析形勢可見明公雖建藩輔之功猶恐無所成立於今之計莫若延攬英雄務悅民心立高祖之業救萬民之命以公而慮天下不足定也光武大悅因令左右號禹曰鄧將軍常宿於中與定計議及王郎起兵光武自薊至信都使禹發奔命得數千人令自將之別攻拔樂陽從至廣阿光武舍城樓上披輿地圖

指示禹曰天下郡國如是今乃始得其一子前言以吾  
慮天下不足定何也禹曰方今海內殽亂人思明君猶  
赤子之慕慈母也古之興者在德薄厚不以大小光武  
悅時任使諸將多訪於禹禹每有所舉皆當其材光武  
以為知人使別將騎與蓋延等擊銅馬於清陽延等先  
至戰不利還保城為賊所圍禹遂進與戰大破之生獲  
其大將從光武追賊至滿陽連大克獲北州畧定及赤  
眉西入關更始使定國上公王匡襄邑王成丹抗威將

軍劉均及諸將分據河東弘農以拒之赤眉衆大集王  
匡等莫能當光武籌赤眉必破長安欲乘釁并關中而  
方有事山東未知所寄以禹沈深有度故授以西討  
之畧乃拜為前將軍持節中分麾下精兵二萬人遣西  
入關令自選偏裨以下可與俱者於是以韓歆為軍師  
李文李春程慮為祭酒馮愔為積弩將軍樊宗為驍騎  
將軍宗歆為車騎將軍鄧尋為建威將軍耿訢為赤眉  
將軍左于為軍師將軍引而西建武元年正月禹自箕

關將入河東河東都尉守關不開禹攻十日破之獲輜  
重千餘乘進圍安邑數月未能下更始大將軍樊參將  
萬人度大陽欲攻禹禹遣諸將逆擊於解南大破之斬  
參首於是王匡成丹劉均等合軍十餘萬復共擊禹禹  
軍不利樊崇戰死會日暮戰罷軍師韓歆及諸將見兵  
勢已摧皆勸禹夜去禹不聽明日癸亥匡等以六甲窮  
日不出禹因得更理兵勒衆明旦匡悉軍出攻禹禹令  
軍中無得妄動既至營下因傳發諸將鼓而並進大破

之匡等皆棄軍亡走禹率輕騎急追獲劉均及河東太守楊寶持節中郎將弭疆皆斬之收得節六印綬五百兵器不可勝數遂定河東承制拜李文為河東太守悉更置屬縣令長以鎮撫之是月光武即位於鄗使使者持節拜禹為大司徒封鄴侯食邑萬戶禹時年二十四遂渡汾陰河入夏陽更始中郎將左輔都尉公乘歛引其衆十萬與左馮翊兵共拒禹於衙禹復破走之而赤眉遂入長安是時三輔連覆敗赤眉所過殘賊百姓不



知所歸聞禹乘勝獨剋而師行有紀皆望風相攜負而  
迎軍降者日以千數衆號百萬禹所止輒停車住節以  
勞來之父老童稚垂髮戴白滿其車下莫不感悅於是  
名震關西帝嘉之數賜書褒美諸將豪傑皆勸禹徑攻  
長安禹曰不然今吾衆雖多能戰者少前無可仰之積  
後無轉餽之資赤眉新拔長安財富充實鋒銳未可當  
也夫盜賊羣起無終日之計財穀雖多變故萬端寧能  
堅守者也上郡北地安定三郡土廣人稀饒穀多畜吾

且休兵北地就糧養士以觀其弊乃可圖也遂引軍至  
柁邑禹所到擊破赤眉別將諸營保郡邑皆開門歸附  
西河太守宗育遣子奉檄降禹遣詣京師帝以關中未  
定而禹久不進兵下勅曰司徒堯也亡賊桀也長安吏  
民惶惶無所依歸宜以時進討鎮慰西京繫百姓之心  
禹猶執前意乃分遣將軍別攻上郡諸縣更徵兵引穀  
歸至大要遣馮愔宗歆守柁邑二人爭權相攻愔遂殺  
歆因反擊禹禹遣使以聞帝問使人愔所親愛為誰對

曰護軍黃防帝度愔防不能久和勢必相忤因報禹曰  
縛馮愔者必黃防也乃遣尚書宗廣持節降之後月餘  
防果執愔將其衆歸罪更始諸將王匡胡殷成丹等皆  
詣廣降與共東歸至安邑道欲亡廣悉斬之愔至洛陽  
赦不誅二年春遣使者更封禹為梁侯食四縣時赤眉  
西走扶風禹至長安軍昆明池謁高廟遣使奉十一帝  
主詣洛陽循行園陵置吏士奉守焉禹引兵與延岑戰  
於藍田不克復就穀雲陽漢中王劉嘉詣禹降嘉相李

寶倨慢無禮禹斬之寶弟收寶部曲擊禹殺將軍耿訢  
自馮愔反後禹威稍損又乏食歸附者離散而赤眉復  
入長安禹與戰敗走至高陵軍士饑餓者皆食棗菜帝  
乃徵禹還勅曰赤眉無穀自當來東吾折箠笞之非諸  
將所憂也無得復妄進禹慙於受任而功不遂數以饑  
卒徼戰輒不利三年春與車騎將軍鄧弘擊赤眉遂為  
所敗衆皆死散獨與二十四騎還詣宜陽謝上大司徒  
梁侯印綬有詔歸侯印綬數月拜右將軍延岑自敗於

東陽遂與秦豐合四年春復寇順陽間遣禹護復漢將  
軍鄧曄輔漢將軍于匡擊破岑於鄧追至武當復破之  
岑奔漢中餘黨悉平十三年天下平定諸功臣皆增戶  
邑定封禹為高密侯食高密昌安夷安淳于四縣帝以  
禹功高封弟寬為明親侯其後左右將軍官罷以特進  
奉朝請禹內文明篤行淳備事母至孝天下既定常欲  
遠名勢有子十三人各使守一藝修整閨門教養子孫  
可為後世法資用國邑不修產利帝益重之中元元年

復行司徒事從東巡狩封岱宗顯宗即位以禹為先帝  
元功拜為太傅進見東向甚尊寵之居歲餘寢疾帝數  
自臨問以子男二人為郎永平元年年五十七薨諡曰  
元侯帝分禹封為三國長子震為高密侯襲為昌安侯  
珍為夷安侯禹少子鴻好籌策永平中以為小侯引入  
與議邊事帝以為能拜將兵長史率五營士屯鴈門肅  
宗時為度遼將軍永元中與大將軍竇憲俱出擊匈奴  
有功徵行車騎將軍出塞追畔胡逢侯坐逗留下獄死

高密侯震卒子乾嗣乾尚顯宗女沁水公主永元十四年陰皇后巫蠱事發乾從兄奉以后舅被誅乾從坐國除元興元年和帝復封乾本國拜侍中乾卒子成嗣成卒子褒嗣尚安帝妹舞陰長公主桓帝時為少府褒卒長子某嗣少子昌龍褒母爵為舞陰侯拜黃門侍郎昌安侯襲嗣子藩亦尚顯宗女平臯長公主和帝時為侍中夷安侯珍子康少有操行兄良襲封無後永初六年紹封康為夷安侯時諸紹封者皆食故國半租康以皇太

后戚屬獨三分食二以侍祠侯為越騎校尉康以太后  
久臨朝政宗門盛滿數上書長樂宮諫爭宜崇公室自  
損私權言甚切至太后不從康心懷憂懼永寧元年遂  
謝病不朝太后使內侍者問之時宮人出入多能有所  
毀譽其中者宿皆稱中大人所使者乃康家先婢亦自  
通中大人康聞詔之曰汝我家出亦敢爾邪婢怨恚還  
說康詐疾而言不遜太后大怒遂免康官遣歸國絕屬  
籍及從兄隲誅安帝徵康為侍中順帝立為太僕有方



正稱名重朝廷以病免加位特進陽嘉三年卒諡曰義  
侯禹第六子訓字平叔少有大志不好文學禹常非之  
顯宗初即位以為郎中樂施下士士大夫多歸之永平  
中治滹沱石臼河從都慮至羊腸倉欲令通漕太原吏  
民苦役連年無成轉運所經三百八十九隘前後溺死  
者不可勝筭建初三年拜訓謁者使監領其事訓考量  
隱括知大功難立具以上言肅宗從之遂罷其役更用  
驢犂車歲省費億萬計全活徒士數千人會上谷太守任

興欲誅赤沙烏桓怨恨謀反詔訓將黎陽營兵屯狐奴以防其變訓撫綏邊民為幽部所歸六年遷護烏桓校尉黎陽故人多攜將老幼樂隨訓徙邊鮮卑聞其威恩皆不敢南近塞下八年舞陰公主子梁扈有罪訓坐私與扈通書徵免歸問里元和三年盧水胡反畔以訓為謁者乘傳到武威拜張掖太守章和二年護降校尉張紆誘誅燒當種羌迷吾等由是諸羌大怒謀欲報怨朝廷憂之公卿舉訓代紆為校尉諸羌激忿遂相與解仇

結婚交質盟詛衆四萬餘人期冰合度河攻訓先是小  
月氏胡分居塞內勝兵者二三千騎皆勇健富彊每與  
羌戰常以少制多雖首施兩端漢亦時收其用時迷吾  
子迷唐別與武威種羌合兵萬騎至塞下未敢攻訓先  
欲脅月氏胡訓擁衛稽故令不得戰議者咸以羌胡相  
攻縣官之利以夷伐夷不宜禁護訓曰不然今張紆失  
信衆羌大動經常屯兵不下二萬轉運之費空竭府帑  
涼州吏民命縣絲髮原諸胡之所以難得其意者皆恩

信不厚耳今因其迫急以德懷之庶能有用遂令開城及所居園門悉驅羣胡妻子內之嚴兵守衛羌掠無所得又不敢逼諸胡因即解去由是湟中諸胡皆言漢家常欲闕我曹今鄧使君待我以恩信開門內我妻子乃得父母咸歡喜叩頭曰唯使君所命訓遂撫養其中少年勇者數百人以為義從羌胡俗恥病死每病臨困輒以刀自刺訓聞有疾困輒拘持縛束不與兵刃使醫藥療之愈者非一大小咸悅於是賞賂諸羌使相招誘迷

唐伯父號迷吾乃將其母及種人八百戶自塞外來降  
訓因發湟中秦胡羌兵四千人出塞掩擊迷唐於寫谷  
斬首虜六百餘人得馬牛羊萬餘頭迷唐乃去大小榆  
居頗巖谷衆悉破散其春復欲歸故地就田業訓乃發  
湟中六千人令長史任尚將之縫革為船置於箬中以  
度河掩擊迷唐廬落大豪多所斬獲復追逐奔北會尚  
等夜為羌所攻於是義從羌胡并力破之斬首前後一  
千八百餘級獲生口二千人馬牛羊三萬餘頭一種殆

盡迷唐遂收其餘部遠徙廬落西行千餘里諸附落小種皆背畔之燒當豪帥東號稽顙歸死餘皆款塞納質於是綏接歸附威信大行遂罷屯兵各令歸郡唯置弛刑徒三千餘人分以屯田為貧人耕種修理城郭塢壁而已永元二年大將軍竇憲將兵鎮武威憲以訓曉羌胡方畧上求偕行訓初厚於馬氏不為諸竇所親及憲誅故不離其禍訓雖寬中容衆而於閨門甚嚴兄弟莫不敬憚諸子進見未嘗賜席接以溫色四年冬病卒官

時年五十三吏人羌胡愛惜旦夕臨者日數千人戎俗  
父母死恥悲泣皆騎馬歌呼至聞訓卒莫不咷號或以  
刀自割又刺殺其犬馬牛羊曰鄧使君已死我曹亦俱  
死耳前烏桓吏士皆奔走道路至空城郭吏執不聽以  
狀白校尉徐偃偃歎息曰此義也乃釋之遂家家為訓  
立祠每有疾病輒此請禱求福元興元年和帝以訓皇  
后之父使謁者持節至訓墓賜策追封諡曰平壽敬侯  
中宮自臨百官大會訓五子隲京悝弘閭隲字昭伯少

辟大將軍竇憲府及女弟為貴人隲兄弟皆除郎中及  
貴人立是為和熹皇后隲三遷虎賁中郎將京悝弘閭  
皆黃門侍郎京卒於官延平元年拜隲車騎將軍儀同  
三司始自隲也悝虎賁中郎將弘閭皆侍中殤帝崩太  
后與隲等定策立安帝悝遷城門校尉弘虎賁中郎將  
自和帝崩後隲兄弟常居禁中隲謙遜不欲久在內連  
求還第歲餘太后乃許之永初元年封隲上蔡侯悝葉  
侯弘西平侯閭西華侯食邑各萬戶隲以定策功增邑



三千戶隲等辭讓不獲遂逃避使者間闕詣闕上疏自陳至誠太后不聽隲頻上疏至於五六乃許之其後涼部畔羌搖蕩西州朝廷憂之於是詔隲將左右羽林北軍五校士及諸部兵擊之車駕幸平樂觀餞送隲西屯漢陽使征西校尉任尚從事中郎司馬鈞與羌戰大敗時以轉輸疲弊百姓苦役冬徵隲班師朝廷以太后故遣五官中郎將迎拜隲為大將軍軍到河南使大鴻臚親迎中常侍齎牛酒郊勞王主以下候望於道既至大

會羣臣賜束帛乘馬寵靈顯赫光震都鄙時遭元二之  
災人士荒饑死者相望盜賊羣起四夷侵畔隲等崇節  
儉罷力役推進天下賢士何熙祿諷羊浸李邵陶敦等  
列於朝廷辟楊震朱寵陳禪置之幕府故天下復安四  
年母新野君寢病隲兄弟並上書求還侍養太后以閭  
最少孝行尤著特聽之賜安車駟馬及新野君薨隲等  
復乞身行服章連上太后許之隲等既還里第並居家  
次閭至孝骨立有聞當時及服闋詔諭隲還輔朝政更

授前封騭等叩頭固讓乃止於是並奉朝請位次在三  
公下特進侯上其有大議乃詣朝堂與公卿參謀元初

二年弘卒太后服齊衰帝絲麻並宿幸其第弘少治歐  
陽尚書授帝禁中諸儒多歸附之初疾病遺言悉以常  
服不得用錦衣玉匣有司奏贈弘驃騎將軍位特進西  
平侯太后追思弘意不加贈位衣服但賜錢千萬布萬  
匹騭等復辭不受詔大鴻臚持節即弘殯封子廣德為  
西平侯將葬有司復奏發五營輕車騎士禮儀如霍光

故事太后皆不聽但白蓋雙騎門生輓送後以帝師之重分西平之都鄉封廣德弟甫德為都鄉侯四年又封京子黃門侍郎珍為陽安侯邑三千五百戶五年悝閻相繼並卒並遺言薄葬不受爵贈太后並從之乃封悝子廣宗為葉侯閻子忠為西華侯自祖父禹教訓子孫皆遵法度深戒竇氏檢勅宗族闔門靜居隲子侍中鳳嘗與尚書郎張龕書屬郎中馬融宜在臺閣又中郎將任尚嘗遺鳳馬後尚坐斷盜軍糧檻車徵詣廷尉鳳懼

事泄先自首於隲隲畏太后遂髡妻及鳳以謝天下稱  
之建光元年太后崩未及大斂帝復申前命封隲為上  
蔡侯位特進帝少號聰敏及長多不德而乳母王聖見  
太后久不歸政慮有廢置常與中黃門李閏候伺左右  
及太后崩宮人先有受罰者懷怨恚因誣告悝弘閻先  
從尚書鄧訪取廢帝故事謀立平原王得帝聞追怒令  
有司奏悝等大逆無道遂廢西平侯廣德葉侯廣宗西  
華侯忠陽安侯珍都鄉侯甫德皆為庶人隲以不與謀

但免特進遣就國宗族皆免官歸故郡没入隲等貨財  
田宅徙鄧訪及家屬於遠郡郡縣逼迫廣宗及忠皆自  
殺又徙封隲為羅侯隲與子鳳並不食而死隲從弟河  
南尹豹度遼將軍舞陽侯遵將作大匠暢皆自殺唯廣  
德兄弟以母閻氏戚屬得留京師大司農朱寵痛隲無  
罪遇禍乃肉袒輿櫬上疏追訟隲曰伏惟和熹皇后聖  
善之德為漢文母兄弟忠孝同心憂國宗廟有主王室  
是賴功成身退讓國遜位聖世外戚無與為比當享積

善履謙之祐而橫為宮人單辭所陷利口傾險反亂國  
家罪無申證獄不訊鞫遂令隲等罹此酷濫一門七人  
並不以命屍骸流離怨魂不反逆天感人率土喪氣宜  
收還冢次寵樹遺孤宗承血祀以謝亡靈寵知其言切  
自致廷尉詔免官歸田里衆庶多為隲稱枉帝意頗悟  
乃遣讓州郡還葬洛陽北芒舊塋公卿皆會喪莫不悲  
傷之詔遣使者祠以中牢諸從昆弟皆歸京師及順帝  
即位追感太后恩訓愍隲無辜乃詔宗正復故大將軍

鄧隲宗親內外朝見皆如故事除隲兄弟子及門從十  
二人悉為郎中擢朱寵為太尉錄尚書事寵字仲威京  
兆人初辟隲府稍遷潁川太守有治聲及拜太尉封安  
鄉侯甚加優禮廣德早卒甫德更召為開封令學傳父  
業喪母遂不仕閻妻耿氏有節操痛鄧氏誅廢子忠早  
卒乃養河南尹豹子嗣為閻後耿氏教之書學遂以通  
博稱永壽中與伏無忌延篤著書東觀官至屯騎校尉  
禹曾孫香子女為桓帝后帝又紹封度遼將軍遵子萬



世為南鄉侯拜河南尹及后廢萬世下獄死其餘宗親  
皆復歸故郡鄧氏自中興後累世寵貴凡侯者二十九  
人公二人大將軍以下十三人中二千石十四人列校  
二十二入州郡牧守四十八人其餘侍中將大夫郎謁  
者不可勝數東京莫與為比

寇恂字子翼上谷昌平人也世為著姓恂初為郡功曹  
太守耿況甚重之王莽敗更始立使使者徇郡國曰先  
降者復爵位恂從耿況迎使者於界上況上印綬使者

納之一宿無還意恂勒兵入見使者就請之使者不與  
曰天王使者功曹欲脅之邪恂曰非敢脅使君切傷計  
之不詳也今天下粗定國信未宣使君建節銜命以臨  
四方郡國莫不延頸傾耳望風歸命今始至上谷而先  
墮大信沮向化之心生離畔之隙將何以號令他郡乎  
且耿府君在上谷久為吏民所親今易之得賢則造次  
未安不賢則祗更生亂為使君計莫若復之以安百姓  
使者不應恂叱左右以使者命召況況至恂進取印綬

帶況使者不得已乃承制授之況受而歸及王郎起遣  
將徇上谷急況發兵恂與門下掾閔業共說況曰邯鄲  
拔起難可信向昔王莽時所難獨有劉伯升耳今聞大  
司馬劉公伯升母弟尊賢下士士多歸之可攀附也況  
曰邯鄲方盛力不能獨拒如何恂曰今上谷完實控弦  
萬騎舉大郡之資可以詳擇去就恂請東約漁陽齊心  
合衆邯鄲不足圖也況然之乃遣恂到漁陽結謀彭寵  
恂還至昌平襲擊邯鄲使者殺之奪其軍遂與況子弇

等俱南及光武於廣阿拜恂為偏將軍號承義侯從破  
羣賊數與鄧禹謀議禹竒之因奉牛酒共交歡光武南  
定河內而更始大司馬朱鮪等盛兵據洛陽又并州未  
安光武難其守問於鄧禹曰諸將誰可守河內者禹曰  
昔高祖任蕭何於關中無復西顧之憂所以得專精山  
東終成大業今河內帶河為固戶口殷實北通上黨南  
迫洛陽寇恂文武備足有牧人御衆之才非此子莫可  
使也光武乃拜恂河內太守行大將軍事光武謂恂曰

河內完富吾將因是而起昔高祖留蕭何於關中今吾  
委公以河內堅守轉運給足軍糧率厲士馬防遏他兵  
勿令北度而已光武於是復北征燕代恂移書屬縣講  
兵肄射伐淇園之竹為矢百餘萬養馬二千疋收租四  
百萬斛轉以給軍朱鮪聞光武北而河內孤使討難將  
軍蘇茂副將賈彊將兵三萬餘人渡鞏河攻溫檄書至  
恂即勒軍馳出移告屬縣發兵會於溫下軍吏皆諫曰  
今洛陽兵度河前後不絕宜待衆軍畢集乃可出也恂

曰溫郡之藩蔽失溫則郡不可守遂馳赴之旦日合戰而偏將軍馮異遣救及諸縣兵適至士馬四集幡旗蔽野恂乃令士卒乘城鼓譟大呼言曰劉公兵到蘇茂軍聞之陣動恂因奔擊大破之追至洛陽遂斬賈彊茂兵自投河死者數千生獲萬餘人恂與馮異過河而還自是洛陽震恐城門晝閉時光武傳聞朱鮪破河內有頃恂檄至大喜曰吾知寇子翼可任也諸將軍賀因上尊號於是即位時乏軍食恂以輦車驪駕轉輸前後不絕

尚書升斗以稟百官帝數策書勞問恂同門生茂陵董  
崇說恂曰上新即位四方未定而君侯以此時據大郡  
內得人心外破蘇茂威震鄰敵此讒人側目怨禍之時  
也昔蕭何守關中悟鮑生之言而高祖悅今君所將皆  
宗族昆弟也無乃當以前人為鏡戒恂然其言稱疾不  
視事帝將攻洛陽先至河內恂求從軍帝曰河內未可  
離也數固請不聽乃遣兄子寇張姊子谷崇將突騎願  
為軍鋒帝善之皆以為偏將軍建武二年恂坐繫考上

書者免是時潁川人嚴終趙敦聚衆萬餘人與密人賈期連兵為寇恂免數月復拜潁川太守與破姦將軍侯進俱擊之數月斬期首郡中悉平定封恂雍奴侯邑萬戶執金吾賈復在汝南部將殺人於潁川恂捕得繫獄時尚草創軍營犯法率多相容恂乃戮之於市復以為恥還過潁川謂左右曰吾與寇恂並列將帥而今為其所陷大丈夫豈有懷侵怨而不決之者乎今見寇恂必手劔之恂知其謀不欲與相見谷崇曰崇將也得帶劔



侍側卒有變足以相當恂曰不然昔藺相如不畏秦王而屈於廉頗者為國也區區之趙尚有此義吾安可以亡之乎乃勅屬縣盛供具儲酒醪執金吾至界一人皆兼二人之饌恂乃出迎於道稱疾而還賈復勒兵欲追之而吏士皆醉遂過去恂遣谷崇以狀聞帝乃徵恂恂至引見時復先在坐欲起相避帝曰天下未定兩虎安得私鬪今日朕分之於是並坐極歡遂共車同出結友而去恂歸潁川三年遣使者即拜為汝南太守又使驃

騎將軍杜茂將兵助恂討盜賊盜賊清靜郡中無事恂素好學乃修鄉校教生徒聘能為左氏春秋者親受學焉七年代朱浮為執金吾明年從車駕擊隗囂而潁川盜賊羣起帝乃引軍還謂恂曰潁川迫近京師當以時定惟念獨卿能平之耳從九卿復出以憂國可知也恂對曰潁川剽輕聞陛下遠踰阻險有事隴蜀故狂狡乘間相誑誤耳如聞乘輿南向賊必惶怖歸死臣願執銳前驅即日車駕南征恂從至潁川盜賊悉降而竟不拜

郡百姓遮道曰願從陛下復借寇君一年乃留恂長社鎮撫吏民受納餘降初隗囂將安定高峻擁兵萬人據高平第一帝使待詔馬援招降峻由是河西道開中郎將來歆承制拜峻通路將軍封關內侯後屬大司馬吳漢共圍囂於冀及漢軍退峻亡歸故營復助囂拒隴坻及囂死峻據高平畏誅堅守建威大將軍耿弇率太中大夫竇士武威太守梁統等圍之一歲不拔十年帝入關將自征之恂時從駕諫曰長安道里居中應接近便

安定隴西必懷震懼此從容一處可以制四方也今士馬疲倦方履險阻非萬乘之固前年潁川可為至戒帝不從進軍及汧峻猶不下帝議遣使降之乃謂恂曰卿前止吾此舉今為吾行也若峻不即降即引耿弇等五營擊之恂奉璽書至第一峻遣軍師皇甫文出謁辭禮不屈恂怒將誅文諸將諫曰高峻精兵萬人率多彊弩西遮隴道連年不下今欲降之而反戮其使無乃不可乎恂不應遂斬之遣其副歸告峻曰軍師無禮已戮之

矣欲降急降不欲固守峻惶恐即日開城門降諸將皆  
賀因曰敢問殺其使而降其城何也恂曰皇甫文峻之  
腹心其所取計者也今來辭意不屈必無降心全之則  
文得其計殺之則峻亡其膽是以降耳諸將皆曰非所  
及也遂傳峻還洛陽恂經明行修名重朝廷所得秩奉  
厚施朋友故人及從吏士常曰吾因士大夫以致此其  
可獨享之乎時人歸其長者以為有宰相器十二年卒  
謚曰威侯子損嗣恂同產弟及兄子姊子以軍功封列

侯者凡八人終其身不傳於後初所與謀閔業者恂數  
為帝言其忠賜爵關內侯官至遼西太守十三年復封  
損庶兄壽為汶侯後徙封損扶柳侯損卒子釐嗣徙封  
商鄉侯釐卒子襲嗣恂女孫為大將軍鄧騭夫人由是  
寇氏得志於永初間恂曾孫榮少知名桓帝時為侍中  
性矜潔自貴於人少所與以此見害於權寵而從兄子  
尚帝妹益陽長公主帝又聘其從孫女於後宮左右益  
惡之延熹中遂陷以罪辟與宗族免歸故郡吏承望風

旨持之寔急榮恐不免奔闕自訟未至刺史張敬追劾  
榮以擅去邊有詔捕之榮逃竄數年會赦令不得除積  
窮困乃自亡命中上書自訟辭語怨忿帝省章愈怒遂  
誅榮寇氏由是遂衰

馮異字公孫潁川父城人也好讀書通左氏春秋孫子  
兵法漢兵起異以郡掾監五縣與父城長苗萌共城守  
為王莽拒漢光武畧地潁川攻父城不下屯兵巾車鄉  
異間出行屬縣為漢兵所執時異從兄孝及同郡丁綝

呂晏並從光武因共薦異得召見異曰異一夫之用不足為彊弱有老母在城中願歸據五城以効功報德光武曰善異歸謂苗萌曰今諸將皆壯士屈起多暴橫獨有劉將軍所到不虜掠觀其言語舉止非庸人也可以歸身苗萌曰死生同命敬從子計光武南還宛更始諸將攻父城者前後十餘輩異堅守不下及光武為司隸校尉道經父城異等即開門奉牛酒迎光武署異為主簿苗萌為從事異因薦邑子銚期叔壽段建左隆等光



武皆以為掾史從至洛陽更始數欲遣光武徇河北諸將皆以為不可是時左丞相曹竟子詡為尚書父子用事異勸光武厚結納之及度河北詡有力焉自伯升之敗光武不敢顯其悲戚每獨居輒不御酒肉枕席有涕泣處異獨叩頭寬譬言哀情光武止之曰卿勿妄言異復因間進說曰天下同苦王氏思漢久矣今更始諸將從橫暴虐所至虜掠百姓失望無所依戴今公專命方面施行恩德夫有桀紂之亂乃見湯武之功民久饑渴易

為充飽宜急分遣官屬徇行郡縣理寃結布恩澤光武  
納之至邯鄲遣異與鈔期乘傳撫循屬縣錄囚徒存鰥  
寡亡命自詣者除其罪陰條二千石長吏同心及不附  
者上之及王郎起光武自薊東南馳晨夕草舍至饒陽  
無葦亭時天寒烈衆皆饑疲異上豆粥明旦光武謂諸  
將曰昨得公孫豆粥饑寒俱解及至南宮遇大風雨光  
武引車入道傍空舍異抱薪鄧禹爇火帝對竈燎衣異  
復進麥飯菟肩因復渡滹沱河至信都使異別收河間

兵還拜偏將軍從破王郎封應侯異為人謙退不伐行  
與諸將相逢輒引車避道進止皆有表識軍中號為整  
齊每所止舍諸將並坐論功異常獨屏樹下軍中號曰  
大樹將軍及破邯鄲乃更分部諸將各有配隸軍士皆  
言願屬大樹將軍光武以此多之別擊破鐵脛於北平  
又降匈奴于林闡頓王因從平河北時更始遣舞陰王  
李軼廩丘王田立大司馬朱鮪白虎公陳僞將兵號三  
十萬與河南大守武勃共守洛陽光武將北徇燕趙以

魏郡河內獨不逢兵而城邑完全倉廩實乃拜寇恂為  
河內太守異為孟津將軍統二郡兵河上與寇恂合勢  
以拒朱鮪等異乃遺李軼書曰愚聞明鏡所以照形往  
事所以知今昔微子去殷而入周項伯畔楚而歸漢周  
勃迎代王而黜少帝霍光尊孝宣而廢昌邑彼皆畏天  
知命覩存亡之符見廢興之事故能成功於一時垂業  
於萬世也苟令長安尚可扶助延期歲月疏不間親遠  
不踰近季文豈能居一隅哉今長安壞亂赤眉臨郊王

侯構難大臣乖離綱紀已絕四方分崩異姓並起是故  
蕭王跋涉霜雪經營河北今英俊雲集百姓風靡雖邠  
岐慕周不足以喻季文誠能覺悟成敗亟定大計論功  
古人轉禍為福在此時矣如猛將長驅嚴兵圍城雖有  
悔恨亦無及矣初軼與光武首結謀約加相親愛及更  
始立反共陷伯升雖知長安已危欲降又不自安乃報  
異書曰軼本與蕭王首謀造漢結死生之約同榮枯之  
計今軼守洛陽將軍鎮孟津俱據機軸千載一會思成

斷金唯深達蕭王願進愚策以佐國安人軼自通書之  
後不復與異爭鋒故異因此得北攻天井關拔上黨二  
城又南下河南成臯已東十三縣及諸屯聚皆平之降  
者十餘萬武勃將萬餘人攻諸畔者異引軍度河與勃  
戰於士鄉下大破斬勃獲首五千餘級軼又閉門不救  
異見其信効具以奏聞光武故宣露軼書令朱鮪知之  
鮪怒使人刺殺軼由是城中乖離多有降者鮪乃遣討  
難將軍蘇茂將數萬人攻溫鮪自將數萬人攻平陰以

綴異異遣校尉護軍將軍將兵與寇恂合擊茂破之異  
因渡河擊鮪鮪走異追至洛陽環城一匝而還移檄上  
狀諸將皆入賀并勸光武即帝位光武乃召異詣部問  
四方動靜異曰三王反叛更始敗亡天下無主宗廟之  
憂在於大王宜從衆議上為社稷下為百姓光武曰我  
昨夜夢乘赤龍上天覺悟心中動悸異因下席再拜賀  
曰此天命發於精神心中動悸大王重慎之性也異遂  
與諸將定議上尊號建武二年春定封異陽夏侯引擊

陽翟賊嚴終趙根破之詔異歸家上冢使太中大夫齎  
牛酒令二百里內太守都尉以下及宗族會焉時赤眉  
延岑暴亂三輔郡縣大姓各擁兵衆大司徒鄧禹不能  
定乃遣異代禹討之車騎送至汝南賜以乘輿七尺具  
劔勅異曰三輔遭王莽更始之亂繼以赤眉延岑之酷  
元元塗炭無所依訴今之征伐非必畧地屠城要在平  
定安集之耳諸將非不健鬪然好虜掠卿本能御史士  
念自修勅無為郡縣所苦異頓首受命引而西所至皆



布威信弘農羣盜稱將軍者十餘輩皆率衆降異異與赤眉遇於華陰相拒六十餘日戰數十合降其將劉始王宣等五千餘人三年春光武遣使者即拜異征西大將軍會鄧禹率車騎將軍鄧弘等引歸與異相遇禹弘要異共攻赤眉異曰異與賊相拒且數十日雖屢獲雄將餘衆尚多可稍以恩信傾誘難卒用兵破也上今使諸將屯澠池要其東而異擊其西一舉取之此萬成計也禹弘不從弘遂大戰移日赤眉陽敗棄輜重走車皆

載土以豆覆其上士卒饑爭取之赤眉引還擊弘弘軍潰亂異與禹合兵救之赤眉小却異以士卒饑倦可且休禹又不聽復戰大為所敗死傷者三千餘人禹得脫歸宜陽異棄馬步走上回谿阪與麾下數人歸營復堅壁收其散卒招集諸營保數萬人與賊約期會戰使壯士變服與赤眉同伏于道側旦日赤眉使萬人攻異前部異裁出兵以救之賊見勢弱悉衆攻異異乃縱兵大戰日昃賊氣衰伏兵卒起衣服相亂赤眉不復識別衆

遂驚潰追擊大破於峭底降男女八萬人餘衆尚十餘  
萬東走宜陽降爾璽書勞異曰赤眉破平士吏勞苦始雖  
垂翅回谿終能奮翼澠池可謂失之東隅收之桑榆方  
論功賞以答大勲時赤眉雖降衆寇猶盛延岑據藍田  
王歆據下邳芳丹據新豐蔣震據霸陵張邯據長安公  
孫守據長陵楊周據谷口呂鮪據陳倉角閔據沂駱蓋  
延據盩厔任良據鄠汝章據槐里各稱將軍擁兵多者  
萬餘少者數千人轉相攻擊異且戰且行屯軍上林苑

中廷岑既破赤眉自稱武安王拜置牧守欲據關中引張邯任良共攻異異擊破之斬首千餘級諸營保守附岑者皆來降歸異岑走攻析異遣復漢將軍鄧曄輔漢將軍丁匡要擊岑大破之降其將蘇臣等八千餘人岑遂自武關走南陽時百姓饑餓人相食黃金一斤易豆五升道路斷隔委輸不至軍士悉以果食為糧詔拜南陽趙匡為右扶風將兵助異并送縑穀軍中皆稱萬歲異兵食漸盛乃稍誅擊豪傑不從令者褒賞降附有功

勞者悉遣其渠帥詣京師散其衆歸本業威行關中唯  
呂鮪張邠蔣震遣使降蜀其餘悉平明年公孫述遣將  
程焉將數萬人就呂鮪出屯陳倉異與趙匡迎擊大破  
之焉退走漢川異追戰於箕谷復破之還擊破呂鮪營  
保降者甚衆其後蜀復數遣將間出異輒摧挫之懷來  
百姓申理枉結出入三歲上林成都異自以久在外不  
自安上書思慕闕庭願親帷幄帝不許後人有章言異  
專制關中斬長安令威權至重百姓歸心號為咸陽王

帝以章示異異惶懼上書謝曰臣本諸生遭遇受命之  
會充備行伍過蒙恩私位大將爵通侯受任方面以立  
微功皆自國家謀慮臣無所能及臣伏自思惟以詔勅  
戰功每輒如意時以私心斷決未嘗不有悔國家獨見  
之明久而益遠乃知性與天道不可得而聞也當兵革  
始起擾攘之時豪傑競逐迷惑千數臣以遭遇託身聖  
明在傾危溷殺之中尚不敢過差而況天下平定上尊  
下卑而臣爵位所蒙巍巍不測乎誠冀以謹勅遂自終

始見所示臣章戰慄怖懼伏念明主知臣愚性固敢因緣自陳詔報曰將軍之於國家義為君臣恩猶父子何嫌何疑而有懼意六年異朝京師引見帝謂公卿曰是我起兵時主簿也為吾披荆棘定關中既罷使中黃門賜以珍寶衣服錢帛詔曰倉卒無葦亭豆粥虜沱河麥飯厚意久不報異稽首謝曰臣聞管仲謂桓公曰願君無忘射鉤臣無忘檻車齊國賴之臣今亦願國家無忘河北之難小臣不敢忘巾車之恩後數引讌見定議圖

蜀留十餘日令異妻子隨異還西夏遣諸將上隴為隗  
囂所敗乃詔異軍柁邑未及至隗囂乘勝使其將王元  
行巡將二萬餘人下隴因分遣巡取柁邑異即馳兵欲  
先據之諸將皆曰虜兵盛而新乘勝不可與爭宜止軍  
便地徐思方畧異曰虜兵臨境忸怩小利遂欲深入若  
得柁邑三輔動搖是吾憂也夫攻者不足守者有餘今  
先據城以逸待勞非所以爭也潛往閉城偃旗鼓行巡  
不知馳赴之異乘其不意卒擊鼓建旗而出巡軍驚亂



奔走追擊數十里大破之祭遵亦破王元於沂於是北地諸豪長耿定等悉畔隗囂降異上書言狀不敢自伐諸將或欲分其功帝患之乃下璽書曰制詔大司馬虎牙建威漢中捕虜武威將軍虜兵猥下三輔驚恐徇邑危亡在於旦夕北地營保按兵觀望今偏城獲全虜兵挫折使耿定之屬復念君臣之義征西功若邱山猶自以為不足孟之反奔而殿亦何異哉今遣太中大夫賜征西吏士死傷者醫藥棺斂大司馬已下親弔死問疾

以宗謙讓於是使異進軍義渠并領北地太守事青山

胡率萬餘人降異異又擊盧芳將賈覽匈奴莫韃日逐

土破之上郡安定皆降異復領安定太守事九年春祭

遵卒詔異守征虜將軍并將其營及隗囂死其將王元

周宗等復立囂子純猶總兵據冀公孫述遣將趙匡等

救之帝復令異行天水太守事攻匡等且一年皆斬之

諸將攻冀不能拔欲且還休兵異固持不動常為衆軍

鋒明年夏與諸將攻洛門未拔病發薨于軍諡曰節侯

長子彰嗣明年帝思異功復封彰弟訢為析鄉侯十三年更封彰東緡侯食三縣永平中徙封平鄉侯彰卒子普嗣有罪國除永初六年安帝追惟建武元功二十八將乃下詔令條其無嗣絕世若犯罪奪國其子孫應當統後者分別署狀上於是紹封普子晨為平鄉侯明年二十八將絕國者皆紹封焉

岑彭字君然南陽棘陽人也王莽時守本縣長漢兵起攻拔棘陽彭將家屬奔前隊大夫甄阜阜怒彭不能固

守拘彭母妻令効功自補彭將賓客戰鬪甚力及甄阜  
死彭被創亡歸宛與前隊貳嚴說共城守漢兵攻之數  
月城中糧盡人相食彭乃與說舉城降諸將欲誅之大  
司徒伯升曰彭郡之大吏執心堅守是其節也今舉大  
事當表義士不如封之以勸其後更始乃封彭為歸德  
侯令屬伯升及伯升遇害彭復為大司馬朱鮪校尉從  
鮪擊王莽揚州牧李聖殺之定淮陽城鮪薦彭為淮陽  
都尉更始遣立威王張卬與將軍徭偉鎮淮陽偉反擊

走印彭引兵攻偉破之遷潁川太守會春陵劉茂起兵  
畧下潁川彭不得之官乃與麾下數百人從河內太守  
邑人韓歆會光武徇河內歆議欲城守彭止不聽既而  
光武至懷歆迫急迎降光武知其謀大怒收歆置鼓下  
將斬之召見彭彭因進說曰今赤眉入關更始危殆權  
臣放縱矯稱詔制道路阻塞四方蜂起羣雄競逐百姓  
無所歸命切聞大王平河北開王業此誠皇天祐漢士  
民之福也彭幸蒙司徒公所見全濟未有報德旋被禍

難永恨於心今復遭遇願出身自效光武深接納之彭  
因言韓歆南陽大人可以為用乃賞歆以為鄧禹軍帥  
更始大將軍呂植將兵屯淇園彭說降之於是拜彭為  
刺姦大將軍使督察衆營授以常所持節從平河北光  
武即位拜彭廷尉歸德侯如故行大將軍事與大司馬  
吳漢大司空王梁建義大將軍朱祐右將軍萬修執金  
吾賈復驍騎將軍劉植揚化將軍堅鐔積射將軍侯進  
偏將軍馮異祭遵王霸等圍洛陽數月朱鮪等堅守不

肯下帝以彭嘗為鮪校尉令往說之鮪在城上彭在城  
下相勞苦歡語如平生彭因言曰彭往者得執鞭侍從  
蒙薦舉拔擢常思有以報恩今赤眉已得長安更始為  
三王所反皇帝受命平定燕趙盡有幽冀之地百姓歸  
心賢俊雲集親率大兵來攻洛陽天下之事逝其去矣  
公雖嬰城固守將何待乎鮪曰大司徒被害時鮪與其  
謀又諫更始無遣蕭王北伐誠自知罪深彭還具言於  
帝帝曰夫建大事者不忌小怨鮪今若降官爵可保況

誅罰乎河水在此吾不食言彭復往告鮪鮪從城上下  
索曰必信可乘此上彭趣索欲上鮪見其誠即許降後  
五日鮪將輕騎詣彭顧勅諸部將曰堅守待我我若不  
還諸軍徑將兵大上轅轅歸郾王尹尊也乃面縛與彭俱

詣河陽帝即解其縛召見之復令彭夜送鮪歸城明旦  
悉其衆出降拜鮪為平狄將軍封扶溝侯鮪淮陽人後  
為少府傅封累世建武二年使彭擊荊州下犍葉等十  
餘城是時南方猶亂南郡人秦豐據黎邱自稱楚黎王



畧有十二縣董訢起堵鄉許邯起杏又更始諸將各擁  
兵據南陽諸城帝遣吳漢伐之漢軍所過多侵暴時破  
虜將軍鄧奉謁歸新野怒吳漢掠其鄉里遂返擊破漢  
軍獲其輜重屯據涇陽與諸賊合從秋彭破杏降許邯  
遷征南大將軍復遣朱祐賈復及建威大將軍耿弇漢  
中將軍王常武威將軍郭守越騎將軍劉宏偏將軍劉  
嘉耿植等與彭并力討鄧奉先擊堵鄉而奉將萬餘人  
救董訢訢奉皆南陽精兵彭等攻之連月不剋三年夏

帝自將南征至葉董訢別將將數千人遮道車騎不得  
前彭奔擊大破之帝至堵陽鄧奉夜逃歸涇陽董訢降  
彭復與耿弇賈復及積弩將軍傅俊騎都尉臧宮等從  
追鄧奉於小長安帝率諸將親戰大破之奉迫急乃降  
帝憐奉舊功臣且釁起吳漢欲全宥之彭與耿弇諫曰  
鄧奉背恩反逆暴師經年致賈復傷夷朱祐見獲陛下  
既至不知悔善而親在行陣兵敗乃降若不誅奉無以  
懲惡於是斬之奉者西華侯鄧晨兄之子也車駕引還

令彭率傅俊臧宮劉宏等三萬餘人南擊秦豐拔黃郵  
豐與其大將蔡宏拒彭等於鄧數月不得進帝怪以讓  
彭彭懼於是夜勒兵馬申令軍中使明旦西擊山都乃  
緩所獲令得逃亡歸以告豐豐即悉其軍西邀彭彭乃  
潛兵度沔水擊其將張楊於阿頭山大破之從川谷間  
伐木開道直襲黎邱擊破諸屯兵豐聞大驚馳歸救之  
彭與諸將依東山為營豐與蔡宏夜攻彭彭豫為之備  
出兵逆擊之豐敗走追斬蔡宏更封彭為舞陰侯秦豐

相趙京舉宜城降拜為成漢將軍與彭共圍豐於黎丘  
時田戎擁衆夷陵聞秦豐被圍懼大兵方至欲降而妻  
兄辛臣諫戎曰今四方豪傑各據郡國洛陽地如掌耳  
不如按甲以觀其變戎曰以秦王之彊猶為征南所圍  
豈況吾邪降計決矣四年春戎乃留辛臣守夷陵自將  
兵沿江泝沔止黎丘刻期日當降而辛臣於後盜戎珍  
寶從間道先降於彭而以書招戎戎疑必賣已遂不敢  
降而反與秦豐合彭出兵攻戎數月大破之其大將伍

公詣彭降戎亡歸夷陵帝幸黎邱勞軍封彭吏士有功者百餘人彭攻秦豐三歲斬首九萬餘級豐餘兵裁千人又城中食且盡帝以豐轉弱令朱祐代彭守之使彭與傅俊南擊田戎大破之遂拔夷陵追至秭歸戎與數十騎亡入蜀盡獲其妻子士衆數萬人彭以將伐蜀漢而夾川谷少水險難漕運留威虜將軍馮駿軍江州都尉田鴻軍夷陵領軍李元軍夷道自引兵還屯津鄉當荊州要會喻告諸蠻夷降者奏封其君長初彭與交趾

牧鄧讓厚善與讓書陳國家威德又遣偏將軍屈充移

檄江南班行詔命於是讓與江夏太守侯登武陵太守

王堂長沙相韓福桂陽太守張隆零陵太守田翕蒼梧

太守杜穆交趾太守錫光等相率貢獻悉封為列侯或

遣子將兵助彭征伐於是江南之珍始流通焉六年冬

徵詣京師數召讌見厚加賞賜復南還津鄉有詔過家

上冢大長秋以朔望問太夫人起居

大長秋皇后屬官  
漢法列侯之母方

稱太夫人八年彭引兵從車駕破天水與吳漢圍隗囂於西

城時公孫述遣將李育將兵救囂守上邽帝留蓋延耿  
弇圍之而車駕東歸勅彭書曰兩城若下便可將兵南  
擊蜀虜人苦不自知足既平隴復望蜀每一發兵頭髮  
為白彭遂壅谷水灌西城城未沒丈餘囂將行巡周宗  
將蜀救兵到囂得出還冀漢軍食盡燒輜重引兵下隴  
延弇亦相隨而退囂出兵尾擊諸營彭殿為後拒故諸  
將能全師東歸彭還津鄉九年公孫述遣其將任滿田  
戎程汎將數萬人乘枋單下江關擊破馮駿及田鴻李

元等遂拔夷道夷陵據荆門虎牙橫江水起浮橋鬪樓  
立攢柱絕水道結營山上以拒漢兵彭數攻之不利於  
是裝直進樓船冒突露橈數千艘十一年春彭與吳漢  
及誅虜將軍劉隆輔威將軍臧宮驍騎將軍劉歆發南  
陽武陵南郡兵又發桂陽零陵長沙委輸棹卒凡六萬  
餘人騎五千匹皆會荆門吳漢以三郡棹卒多費糧穀  
欲罷之彭以蜀兵盛不可遣上書言狀帝報彭曰大司  
馬習用步騎不曉水戰荆門之事一由征南公為重而



已彭乃令軍中募攻浮橋先登者上賞於是偏將軍魯  
竒應募而前時天風狂急彭竒船逆流而上直衝浮橋  
而攢柱鈎不得去竒乘勢殊死戰因飛炬焚之風怒火  
盛橋樓崩燒彭復悉軍順風並進所向無前蜀兵大亂  
溺死者數千人斬任滿生獲程汎而田戎亡保江州彭  
上劉隆為南郡太守自率臧宮劉歆長驅入江關令軍  
中無得虜掠所過百姓奉牛酒迎勞彭見諸耆老為言  
大漢衰愍巴蜀久見虜役故興師遠伐以討有罪為民

除害讓不受牛酒百姓皆大喜悅爭開門降詔彭守益  
州牧所下郡輒行太守事彭到江州以田戎食多難卒  
拔留馮駿討之自引兵乘利直指墊江攻破平曲收其  
米數十萬石公孫述使其將延岑呂鮪王元及其弟恢  
悉兵拒廣漢及資中又遣將侯丹率二萬餘人拒黃石  
彭乃多張疑兵使護軍楊翕與臧宮拒延岑等而自分  
兵浮江下還江州泝都江而上襲擊侯丹大破之因晨  
夜倍道兼行二千餘里徑拔武陽使精騎馳廣都去成

都數十里勢若風雨所至皆奔散初述聞漢兵在平曲故遣大兵逆之及彭至武陽繞出延岑軍後蜀地震駭述大驚以杖擊地曰是何神也時彭所營地名彭亡聞而惡之欲徙會日暮蜀刺客詐為亡奴降夜刺殺彭彭首破荆門長驅武陽持軍整齊秋毫無犯邛穀王任貴聞彭威信數千里遣使迎降會彭已薨帝盡以任貴所獻賜彭妻子諡曰壯侯蜀人憐之為立廟武陽歲時祀焉子遵嗣徙封細陽侯十三年帝思彭功復封遵弟淮

為穀陽侯遵永平中為屯騎校尉遵卒子伉嗣伉卒子  
杞嗣元初二年坐事失國延光元年安帝復封杞細陽  
侯順帝時為光祿勳杞卒子熙嗣尚安帝妹涅陽長公  
主少為侍中虎賁中郎將朝廷多稱其能遷魏郡太守  
招聘隱逸與參政事無為而化視事二年與人歌之曰  
我有枳棘岑君伐之我有蝨賊岑君遏之狗吠不驚足  
下生甍含哺鼓腹焉知凶災我喜我生獨丁斯時美矣  
岑君於戲休茲熙卒子福嗣為黃門侍郎

賈復字君文南陽冠軍人也少好學習尚書事舞陰李  
生李生竒之謂門人曰賈君之容貌志氣如此而勤於  
學將相之器也王莽末為縣掾迎鹽河東會遇盜賊等  
比十餘人皆放散其鹽復獨完以還縣縣中稱其信時  
下江新市兵起復亦聚衆數百人於羽山自號將軍更  
始立乃將其衆歸漢中王劉嘉以為校尉復見更始政  
亂諸將放縱乃說嘉曰臣聞圖堯舜之事而不能至者  
湯武是也圖湯武而不能至者桓文是也圖桓文而不

能至者六國是也定六國之規欲安守之而不能至者  
亡六國是也今漢室中興大王以親戚為藩輔天下未  
定而安守所保所保得無不可保乎嘉曰卿言大非吾  
任也大司馬劉公在河北必能相施第持我書徃復遂  
辭嘉受書北渡河及光武於栢人因鄧禹得召見光武  
竒之禹亦稱有將帥節於是署復為破虜將軍督盜賊  
復馬羸帝解左驂以賜之官屬以復後來而好陵折等  
輩補調鄣尉光武曰賈督有折衝千里之威方任以職

勿得擅除光武至信都以復為偏將軍及拔邯鄲遷都  
護將軍從擊青犢於射犬大戰至日中賊陳堅不卻光  
武傳召復曰吏士皆饑可且朝飯復曰先破之然後食  
耳於是被羽先登所向皆靡賊乃敗走諸將咸服其勇  
又北與五校戰於真定大破之復傷創甚光武大驚曰  
我所以不令賈復別將者為其輕敵也果然失吾名將  
聞其婦有孕生女邪我子娶之生男邪我女嫁之不令  
其憂妻子也復尋病愈追及光武於薊相見甚歡大享

士卒令復居前擊鄴賊破之光武即位拜為執金吾封  
冠軍侯先渡河攻朱鮪於洛陽與白虎公陳儵戰連破  
降之建武二年益封穰朝陽二縣更始郾王尹尊及諸  
大將在南方未降者尚多帝召諸將議兵事未有言沈  
吟久之乃以檄叩地曰郾最彊宛為次誰當擊之復率  
然對曰臣請擊郾帝笑曰執金吾擊郾吾復何憂大司  
馬當擊宛遂遣復與騎都尉陰識驍騎將軍劉植南度  
五社津擊郾連破之月餘尹尊降盡定其地引東擊更



始淮陽太守暴汜汜降屬縣悉定其秋南擊召陵新息  
平定之明年春遷左將軍別擊赤眉於新城澠池間連  
破之與帝會宜陽降赤眉復每從征伐未嘗喪敗數與  
諸將潰圍解急身被十二創帝以復敢深入希令遠征  
而壯其勇節常自從之故復少方面之勲諸將每論功  
自伐復未嘗有言帝曰賈君之功我自知之十三年定  
封膠東侯食郁秩壯武下密即墨棃胡觀陽凡六縣復  
知帝欲偃干戈修文德不欲功臣擁衆京師乃與高密

侯鄧禹並剽甲兵敦儒學帝深然之遂罷左右將軍復以列侯就第加特進復為人剛毅方直多大節既還私第闔門養威重朱祐等薦復宜為宰相帝方以吏事責三公故功臣並不用是時列侯惟高密固始膠東三侯與公卿參議國家大事恩遇甚厚三十一年卒諡曰剛侯子忠嗣忠卒子敏嗣建初元年坐誣告母殺人國除肅宗更封復少子邯為膠東侯邯弟宗為即墨侯各一縣邯卒子育嗣育卒子長嗣宗字武孺少有操行多智

畧初拜郎中稍遷建初中為朔方太守舊內郡徙在邊者率多貧弱為居人所僕役不得為吏宗擢用其任職者與邊吏參選轉相監司以擿發其姦或以功次補長吏故各願盡死匈奴畏之不敢入塞徵為長水校尉宗兼通儒術每讌見常使與少府丁鴻等論議於前章和二年卒朝廷愍惜焉子參嗣參卒子建嗣元初元年尚和帝女臨穎長公主兼食穎陰許合三縣數萬戶時鄧太后臨朝光寵最盛以建為侍中順帝時為光祿勳

吳漢字子顏南陽宛人也家貧給事縣為亭長王莽末以賓客犯法乃亡命至漁陽資用乏以販馬自業往來燕薊間所至皆交結豪傑更始立使使者韓鴻徇河北或謂鴻曰吳子顏奇士也可與計事鴻召見漢甚悅之遂承制拜為安樂令會王郎起北州擾惑漢素聞光武長者獨欲歸心乃說太守彭寵曰漁陽上谷突騎天下所聞也君何不合二郡精銳附劉公擊邯鄲此一時之功也寵以為然而官屬皆欲附王郎寵不能奪漢乃辭

出止外亭念所以譎衆未知所出望見道中一人似儒  
生者漢使人召之為具食問以所聞生因言劉公所過  
為郡縣所歸邯鄲舉尊號者實非劉氏漢大喜即詐為  
光武書移檄漁陽使生齎以詣寵令具以所聞說之漢  
復隨後入寵甚然之於是遣漢將兵與上谷諸將并軍  
而南所至擊斬王郎將帥及光武於廣阿拜漢為偏將  
軍既拔邯鄲賜號建策侯漢為人質厚少文造次不能  
以辭自達鄧禹及諸將多知之數相薦舉乃得召見遂

見親信常居門下光武將發幽州兵夜召鄧禹問誰可使行者禹曰間數與吳漢言其人勇鷙有智謀諸將鮮能及者即拜漢大將軍持節北發十郡突騎更始幽州牧苗曾聞之陰勅諸郡不肯應調漢乃將二十騎先馳至無終曾以漢無備出迎於路漢即搗兵騎收曾斬之而奪其軍北州震駭城邑莫不望風弭從遂悉發其兵引而南與光武會清陽諸將望見漢還士馬甚盛皆曰是寧肯分兵與人邪及漢至莫府上兵簿諸將人人多

請之光武曰屬者恐不與人今所請又何多也請將皆  
慚初更始遣尚書令謝躬率六將軍攻王郎不能下會  
光武至共定邯鄲而躬裨將虜掠不相承稟光武深忌  
之雖俱在邯鄲遂分城而處然每有以慰安之躬勤於  
職事光武常稱曰謝尚書真吏也故不自疑躬既而率  
其兵數萬還屯於鄴時光武南擊青犢謂躬曰我追賊  
於射犬必破之尤來在山陽者勢必當驚走若以君威  
力擊此散虜必成禽也躬曰善及青犢破而尤來果北

走隆慮山躬乃留大將軍劉慶魏郡太守陳康守鄴自  
率諸將軍擊之窮寇死戰不顧躬遂大敗死者數千人  
光武因躬在外乃使漢與岑彭襲其城漢先令辯士說  
陳康曰蓋聞上智不處危以僥倖中智能因危以成功  
下愚安於危以自亡危亡之至在人所由不可不察今  
京師敗亂四方雲擾公所聞也蕭王兵彊士附河北歸  
命公所見也謝躬內背蕭王外失衆心公所知也公今  
據孤危之城待滅亡之禍義無所立節無所成不若開



門內軍轉禍為福免下愚之敗收中智之功此計之至  
者也康然之於是康收劉慶及躬妻子開門內漢等及  
躬從隆慮歸鄴不知康已反之乃與數百騎輕入城漢  
伏兵收之手擊殺躬其衆悉降躬字子張南陽人初其  
妻知光武不平之常戒躬曰吾與劉公積不相能而信  
其虛談不為之備終受制矣躬不納故及於難光武北  
擊羣賊漢常將突騎五千為軍鋒數先登陷陣及河北  
平漢與諸將奉圖書上尊號光武即位拜漢大司馬封

舞陽侯建武二年春漢率大司空王梁建義大將軍朱  
祐大將軍杜茂執金吾賈復揚化將軍堅鐔偏將軍王  
霸騎都尉劉隆馬武陰識共擊檀鄉賊於鄴東漳水上  
大破之降者十餘萬人帝使使者璽書定封漢為廣平  
侯食廣平斥漳曲周廣平凡四縣復率諸將擊鄴西山  
賊黎伯卿等及河內修武悉破諸屯聚車駕親幸撫勞  
復遣漢進兵南陽擊宛涅陽酈穰新野諸城皆下之引  
兵南與秦豐戰黃郵水上破之又與偏將軍馮異擊昌

城五樓賊張文等又攻銅馬五幡於新安皆破之明年春率建威大將軍耿弇虎牙大將軍蓋延擊青犢於軹西大破降之又率驃騎大將軍杜茂彊弩將軍陳俊等圍蘇茂於廣樂劉永將周建別招聚收集得十萬餘人救廣樂漢將輕騎迎與之戰不利墮馬傷膝還營建等遂連兵入城諸將謂漢曰大敵在前而公傷臥衆心懼矣漢乃勃然裹創而起椎牛享士令軍中曰賊衆雖多皆刼掠羣盜勝不相讓敗不相救非有仗節死義者也

今日封侯之秋諸君勉之於是軍士激怒人倍其氣旦  
日建茂出兵圍漢漢選四部精兵黃頭吳河等及烏桓  
突騎三千餘人齊鼓而進建軍大潰反還奔城漢長驅  
追擊爭門並入大破之茂建突走漢留杜茂陳俊等守  
廣樂自將兵助蓋延圍劉永於睢陽永既死二城皆降  
明年又率陳俊及前將軍王梁擊破五校賊於臨平追  
至東郡箕山大破之北擊清河長直及平原五里賊皆  
平之時鬲縣五姓共逐守長據城反諸將爭欲攻之漢

不聽曰使鬲反者皆守長罪也敢輕冒進兵者斬乃檄告郡使收守長而使人謝城中五姓大喜即相率而降諸將乃服曰不戰而下城非衆所及也冬漢率建威大將軍耿弇漢中將軍王常等擊富平獲索二賊於平原明年春賊率五萬餘人夜攻漢營軍中驚亂漢堅臥不動有頃乃定即夜發精兵出營突擊大破其衆因追討餘黨遂至無鹽進擊勃海皆平之又從征董憲圍朐城明年春拔朐斬憲事已見劉永傳東方悉定振旅還京

師會隗囂畔夏復遣漢西屯長安八年從車駕上隴圍  
隗囂於西城帝勅漢曰諸郡甲卒俱坐費糧食若有逃  
亡則沮敗衆心宜悉罷之漢等貪并力攻囂遂不能遣  
糧食日少吏士疲役逃亡者多及公孫述救至漢遂退  
敗十一年春率征南大將軍岑彭等伐公孫述及彭破  
荆門長驅入江關漢留夷陵裝露撓船將南陽兵及弛  
刑募士三萬人泝江而上會岑彭為刺客所殺漢并將  
其軍十二年春與公孫述將魏黨公孫永戰於魚涪津

大破之遂圍武陽述遣子壻史興將五千人救之漢迎擊興盡殄其衆因入捷為界諸縣皆城守漢乃進軍攻廣都拔之使輕騎燒成都市橋武陽以東諸小城皆降帝戒漢曰成都十餘萬衆不可輕也但堅據廣都待其來攻勿與爭鋒若不敢來公轉營迫之須其力疲乃可擊也漢乘利遂將步騎二萬餘人進逼成都去城十餘里阻江北為營作浮橋使副將武威將軍劉尚將萬餘人屯於江南相去二十餘里帝聞大驚讓漢曰比勅公

千條萬端何意臨事悖亂既輕敵深入又與尚別營事  
有緩急不復相及賊若出兵綴公以大衆攻尚尚破公  
即敗矣幸無他者急引兵還廣都詔書未到述果使其  
將謝豐袁吉將衆十許萬分為二十營并出攻漢使別  
將萬餘人劫劉尚令不得相救漢與大戰一日兵敗走  
入壁豐因圍之漢召諸將厲之曰吾共諸君踰越險阻  
轉戰千里所在斬獲遂深入敵地至其城下而今與劉  
尚二處受圍勢既不接其禍難量欲潛師就尚於江南



并兵禦之若能同心一力人自為戰大功可立如其不然敗必無餘成敗之機在此一舉諸將皆曰諾於是饗士秣馬閉營三日不出乃多樹幡旗使煙火不絕夜銜枚引兵與劉尚合軍豐等不覺明日乃分兵拒水北自將攻江南漢悉兵迎戰自旦至晡大破之斬謝豐袁吉獲甲首五千餘級於是引還廣都留劉尚拒述具以狀上而深自譴責帝報曰公還廣都甚得其宜述必不敢略尚而擊公也若先攻尚公從廣都五十里悉步騎赴

之適當值其危困破之必矣自是漢與大戰於廣都成都之間八戰八剋遂軍于其郭中述自將數萬人出城大戰漢使護軍高午唐邯將數萬銳卒擊之述兵敗走高午奔陳刺述殺之事已見述傳旦日城降斬述首傳送洛陽明年正月漢振旅浮江而下至宛詔令過家上冢賜穀二萬斛十五年復率揚武將軍馬成捕虜將軍馬武北擊匈奴徙鴈門代郡上谷吏民六萬餘口置居庸常關以東十八年蜀郡守將史歆反於成都自稱大

司馬攻太守張穆穆踰城走廣都歆遂移檄郡縣而宥渠楊偉胸臆徐容等起兵各數千人以應之帝以歆昔為岑彭護軍曉習兵事故遣漢率劉尚及太中大夫臧宮將萬餘人討之漢入武都乃發廣漢巴蜀三郡兵圍成都百餘日城破誅歆等漢乃乘桴沿江下巴郡楊偉徐容等惶恐解散漢誅其渠帥二百餘人徙其黨與數百家於南郡長沙而還漢性彊力每從征伐帝未安恒側足而立諸將見戰陳不利或多惶懼失其常度漢意

氣自若方整厲器械激揚士吏帝時遣人觀大司馬何為還言方修戰攻之具乃歎曰吳公差彊人意隱若一敵國矣每當出師朝受詔夕即引道初無辨嚴之日故能常任職以功名終及在朝廷斤斤謹質形於體貌漢常出征妻子在後買田業漢還讓之曰軍師在外吏士不足何多買田宅乎遂盡以分與昆弟外家二十年漢病篤車駕親臨問所欲言對曰臣愚無所知識唯願陛下慎無赦而已及薨有詔悼愍賜諡曰忠侯詔發北軍

五校輕車介士送葬如大將軍霍光故事子哀侯成嗣  
為奴所殺二十八年分漢封為三國成子旦為濯陽侯  
以奉漢嗣旦弟盱為筑陽侯成弟國為新蔡侯旦卒無  
子國除建初八年徙封盱為平春侯以奉漢後盱卒子  
勝嗣初漢兄尉為將軍從征戰死封尉子彤為安陽侯  
帝以漢功大復封弟翕為褒親侯吳氏侯者凡五國初  
漁陽都尉嚴宣與漢俱會光武於廣阿光武以為偏將  
軍封建信侯

蓋延字巨卿漁陽要陽人也身長八尺彎弓三百斤邊俗尚勇力而延以氣聞歷郡列掾州從事所在職辦彭寵為太守召延署營尉行護軍及王郎起延與吳漢同謀歸光武延至廣阿拜偏將軍號建功侯從平河北光武即位以延為虎牙將軍建武二年更封安平侯遣南擊敖倉轉攻酸棗封丘皆拔其夏督駙馬都尉馬武騎都尉劉隆護軍都尉馬成偏將軍王霸等南伐劉永攻拔襄邑進取麻鄉遂圍永於睢陽數月盡收野麥夜梯

其城入永驚懼引兵走出東門延追擊大破之永棄軍走譙延進攻拔薛斬其魯郡太守而彭城扶陽杼秋蕭皆降又破永沛郡太守斬之永將蘇茂佼彊周建等三萬餘人救永共攻延與戰於沛西大破之永軍亂遁沒溺死者大半永棄城走湖陵茂奔廣樂延遂定沛楚臨淮修高祖廟置嗇夫祝宰樂人三年睢陽復反城迎劉永延復率諸將圍之百日收野穀永乏食突走延追擊盡得輜重永為其將所殺永弟防舉城降四年春延又

擊蘇茂周建於蘄進與董憲戰留下皆破之因率平敵將軍龐萌攻西防拔之復追敗周建蘇茂於彭城茂建亡奔董憲將賁休舉蘭陵城降憲聞之自郟圍休時延及龐萌在楚請往救之帝勅曰可直往擣郟則蘭陵必自解延等以賁休城危遂先赴之憲逆戰而陽敗延等遂逐退因拔圍入城明日憲大出兵合圍延等懼遽出突走因往攻郟帝讓之曰間欲先赴郟者以不意故耳今既奔走賊計已立圍豈可解乎延等至郟果不能克



而董憲遂拔蘭陵殺賁休延等往來要擊憲別將於彭城郟邳之間戰或日數合頗有剋獲帝以延輕敵深入數以書誡之及龐萌反攻殺楚郡太守引軍襲敗延延走北度泗水破舟楫壞津梁僅而得免帝自將而東徵延與大司馬吳漢漢忠將軍王常前將軍王梁捕虜將軍馬武討虜將軍王霸等會任城討龐萌於桃鄉又從征董憲於昌慮皆破平之六年春遣屯長安九年隗囂死延西擊街泉略陽清水諸屯聚皆定十一年與中郎

將來歛攻河池未剋以病引還拜為左馮翊將軍如故  
十三年增封定食萬戶十五年薨於位子扶嗣扶卒子  
側嗣永平十三年坐與舅王平謀反伏誅國除永初七  
年鄧太后紹封延曾孫恢為盧亭侯恢卒子遂嗣

陳俊字子昭南陽西鄂人也少為郡吏更始立以宗室  
劉嘉為太常將軍俊為長史光武徇河北嘉遣書薦俊  
光武以為安集掾從擊銅馬於清陽進至滿陽拜彊弩  
將軍與五校戰於安次俊下馬手接短兵所向必破追

奔二十餘里斬其渠帥而還光武望而歎曰戰將盡如是豈有憂哉五校引退入漁陽所過虜掠俊言於光武曰宜令輕騎出賊前使百姓各自堅守壁以絕其食可不戰而殄也光武然之遣俊將輕騎馳出賊前視人保壁堅完者勅令固守放散在野者因掠取之賊至無所得遂散敗及軍還光武謂俊曰因此虜者將軍策也及即位封俊為列侯建武二年春攻匡賊下四縣更封新處侯引擊頓丘降三城其秋大司馬吳漢承制拜俊為

疆弩大將軍別擊金門白馬賊於河內皆破之四年轉  
徇汝陽及項又拔南武陽是時太山豪傑多擁衆與張  
步連兵吳漢言於帝曰非陳俊莫能定此郡於是拜俊  
太山太守行大將軍事張步聞之遣其將擊俊戰於羸  
下俊大破之追至濟南收得印綬九十餘稍攻下諸縣  
遂定太山五年與建威大將軍耿弇共破張步事在弇  
傳時琅琊未平乃徙俊為琅琊太守領將軍如故盜賊  
皆解散俊將兵擊董憲於贛榆進破朐賊孫陽平之八

年張步畔還瑯琊俊追討斬之帝美其功詔俊得專征青徐俊得撫貧弱表有義檢制軍吏不得與郡縣相干百姓歌之數上書自請願奮擊隴蜀詔報曰東州新平大將軍之功也負海猾夏盜賊之處國家以為重憂且勉鎮撫之十三年增邑定封祝阿侯明年徵奉朝請二十三年卒子浮嗣徙封蕪春侯浮卒子專諸嗣專諸卒

子篤嗣

臧宮字君翁潁川郟人也少為縣亭長游徼後率賓客

入下江兵中為校尉因從光武征戰諸將多稱其勇光武察宮勤力少言甚親納之及至河北以為偏將軍從破羣賊數陷陣卻敵光武即位以為侍中騎都尉建武二年封成安侯明年將突騎與征虜將軍祭遵擊更始將左防韋顏於沮陽酈悉降之三年將兵徇江夏擊代鄉鍾武竹里皆下之帝使大中大夫持節拜宮為輔威將軍七年更封期思侯擊梁郡濟陰皆平之十一年將兵至中盧屯駱越是時公孫述將田戎任滿與征南大

將軍岑彭相拒於荆門彭等數戰不利越人謀畔從蜀  
宮兵少力不能制會屬縣送委輸車數百乘至宮夜使  
鋸斷城門限令車聲回轉出入至旦越人候伺者聞車  
聲不絕而門限斷相告以漢兵大至其渠帥乃奉牛酒  
以勞軍營宮陳兵大會擊牛醢酒享賜慰納之越人由  
是遂安宮與岑彭等破荆門別至垂鵲山通道出秭歸  
至江州岑彭下巴郡使宮將降卒五萬從涪水上平曲  
公孫述將延岑盛兵於沅水時宮衆多食少轉輸不至

而降者皆欲散畔郡邑復更保聚觀望成敗宮欲引還  
恐為所反會帝遣謁者將兵詣岑彭有馬七百匹宮矯  
制取以自益晨夜進兵多張旗幟登山鼓譟右步左騎  
挾船而引呼聲動山谷岑不意漢軍卒至登山望之大  
震恐宮因縱擊大破之斬首溺死者萬餘人水為之濁  
流延岑奔成都其衆悉降盡獲其兵馬珍寶自是乘勝  
追北降者以十萬數軍至平陽鄉蜀將王元舉衆降進  
拔綿竹破涪城斬公孫述弟恢復攻拔繁郫前後收節



五印綬千八百是時大司馬吳漢亦乘勝進營逼成都宮連屠大城兵馬旌旗甚盛乃乘兵入小雒郭門歷成都城下至吳漢營飲酒高會漢見之甚歡謂宮曰將軍向者經虜城下震揚威靈風行電照然窮寇難量還營願從他道矣宮不聽復路而歸賊亦不敢近之進軍咸門與吳漢並滅公孫述帝以蜀新定拜宮為廣漢太守十三年增邑更封鄼侯十五年徵還京師以列侯奉朝請定封朗陵侯十八年拜太中大夫十九年妖巫維汜

弟子單臣傅鎮等復妖言相聚入原武城劫吏人自稱將軍於是遣宮將北軍及黎陽營數千人圍之賊穀食多數攻不下士卒死傷帝召公卿諸侯王問方畧皆曰宜重其購賞時顯宗為東海王獨對曰妖巫相劫執無久立其中必有悔欲亡者但外圍急不得走耳宜少挺緩令得逃亡逃亡則一亭長足以禽耳帝然之即勅宮徹圍緩賊賊衆分散遂斬臣鎮等宮還遷城門校尉復轉左中郎將擊武谿賊至江陵降之宮以謹信質朴故

常見任用後匈奴饑疫自相分爭帝以問宮宮曰願得  
五千騎以立功帝笑曰常勝之家難與慮敵吾方自思  
之二十七年宮與揚虛侯馬武上書曰匈奴貪利無有  
禮信窮則稽首安則侵盜緣邊被其毒害內國憂其抵  
突虜今人畜疫死旱蝗赤地疫困之力不當中國一郡  
萬里死命縣在陛下福不再來時或易失豈宜固守文  
德而墮武事乎今命將臨塞厚縣購賞諭告高句驪烏  
桓鮮卑攻其左發河西四郡天水隴西羌胡擊其右如

此北虜之滅不過數年臣恐陛下仁恩不忍謀臣狐疑  
令萬世刻石之功不立於聖世詔報曰黃石公記曰柔  
能制剛弱能制彊柔者德也剛者賊也弱者仁之助也  
彊者怨之歸也故曰有德之君以所樂樂人無德之君  
以所樂樂身樂人者其樂長樂身者不久而亡舍近謀  
遠者勞而無功舍遠謀近者逸而有終逸政多忠臣勞  
政多亂人故曰務廣地者荒務廣德者彊有其者安  
貪人有者殘殘滅之政雖成必敗今國無善政災變不

息百姓驚惶人不自保而復欲遠事邊外乎孔子曰吾  
恐季孫之憂不在顓臾且北狄尚彊而屯田警備傳聞  
之事恒多失實誠能舉天下之半以滅大寇豈非至願  
苟非其時不如息人自是諸將莫敢復言兵事者宮永  
平元年卒諡曰愍侯子信嗣信卒子震嗣震卒子松嗣  
元初四年與母別居國除永寧元年鄧太后紹封松弟  
由為朗陵侯



通志卷一百五



總校官庶吉士臣侍朝

校對官助教臣金學詩

謄錄監生臣觀音保